

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
BROJ: 43 0 K 264815 25 K
Zenica, 11.12.2025.godine

U IME FEDERACIJE BOSNE I HERCEGOVINE !

Općinski sud u Zenici, sudija Agić Sabrija, kao pojedinac, uz učešće Drino Melite, u krivičnom predmetu protiv optuženog A.Z., zbog produženo krivičnog djela Zloupotreba položaja ili ovlaštenja iz člana 383. stav 1. KZ FBiH a u vzi člana 55.KZFBiH, po optužnici Kantonalnog tužilaštva Zenica broj: T04 0 KTK 0055124 24 od 03.09.2025. godine, nakon održanog usmenog, glavnog i javnog pretresa, u prisutnosti tužioca Šabić Alena, optuženog A.Z. i branioca Tomaš Slavena, advokat iz Zenice, dana 11.12.2025. godine donio je i javno objavio:

PRESUDU

Optuženi A.Z., zvani „Z.“, sin R. M. A. i majke H.rodene A., rođen godine u D., S., nastanjen na adresi ..., Grad Zenica, po narodnosti ..., državljanin Bosne i Hercegovine, JMB: ..., oženjen, supruga nezaposlena, otac troje maloljetne djece, pismen, sa VSS, po zanimanju doktor medicine, specijalista ginekologije, zaposlen, plata u iznosu od 3.500,00 KM, od imovine posjeduje stan i automobil, dobrog imovnog stanja, neosuđivan,

KRIV JE

Što je,
dana 16.01.2022. godine i 05.08.2022. godine u Z., kao odgovorna osoba u Federaciji BiH, u smislu člana 2. stav 6. KZ F BiH i to kao doktor medicine specijalista u ..., koje radno mjesto je propisano u Pravilniku o radu broj: 00-1-02-33-1/21 od 19.01.2021. godine sa priložima Pravilnika (Sistematizacija), kojem je s obzirom na njegovu dužnost povjeren određen krug poslova koji se odnose na primjenu zakona ili propisa donesenih na osnovu zakona, iskoristio svoja službena ovlaštenja protivno interesima službe koja su propisana u članu 4. i 5. Zakona o liječništvu (Službene novine FBiH broj 56/13) koji propisuje da je liječnik zdravstveni radnik sa završenim medicinskim fakultetom i stečenim nazivom doktor medicine, da je liječnik osnovni i mjerodavni nosilac zdravstvene djelatnosti, da je liječnička djelatnost dio zdravstvene djelatnosti koja obuhvata između ostalog pregled kojim se utvrđuje postojanje ili nepostojanje tjelesnih, odnosno psihičkih bolesti, tjelesnih oštećenja ili anomalija, liječenje i rehabilitaciju, izdavanje liječničkih uvjerenja, svjedodžbi, potvrda i mišljenja, te su navedena ovlaštenja detaljnije opisana u članu 4. Ugovora o radu broj: 31-30-2055-2/21 od 21.06.2021. godine u kojem je, između ostalog, propisano da doktor medicine specijalista između ostalog, obavlja sve poslove iz djelatnosti svoje stručne kvalifikacije, da je preglede i pružanje liječničke djelatnosti dužan obavljati na način i pod uvjetima utvrđenim Propisima o zdravstvenoj zaštiti, pa je koristeći se svojim ovlaštenjima doktora medicine specijaliste, pribavio korist sebi i ošteti drugog na način da je:

1. dana 16.01.2022. godine nakon što je pacijentica B.Š.primljena u JU KB Zenica radi poroda, pozvao njenog supruga B.M.u svoju kancelariju, te istom rekao da je njegova supruga otvorena četiri prsta i da bi trebalo da se porodi, te da je on tu tokom dana i da će se pobrinuti da porod bude uredan, da bi potom B. M. iz straha za suprugu i dijete ponudio 100,00 KM A.Z.u, a koji novac je Z.uzeo i stavio u svoj džep, da bi potom istog dana Z. porodio B.Š., na koji način je sebi pribavio imovinsku korist u iznosu primljenog novca od 100,00 KM, a pacijentici B.Š. i njenog supruga B.M.ošteti za navedeni iznos, iako je znao i bio svjestan da se porodi u JU Kantonalna bolnica Zenica ne naplaćuju ni jednoj pacijentici koja je iz Zeničko-dobojskog kantona i da na taj način sebi pribavlja korist i B.Š. i B. M. čini štetu, a što je i htio,

2. dana 05.08.2022. godine nakon što je pacijentica H. M. primljena u JU KB Zenica radi poroda, istoj je prišao A.Z., te je istu pitao s kim je došla, pa nakon što je M. odgovorila da je došla sa suprugom H. E., A.Z. joj rekao da pozove supruga, što je ona i uradila, nakon čega se H. E. vratio u prostorije JU KB Zenica, da bi ga potom Z. odveo u svoju kancelariju gdje je E. rekao da je njegova supruga prenijela trudnoću 15 dana, te da je to opasno za bebu i za pacijenticu, da je neophodno hitno poroditi njegovu suprugu, te da je on dežurni sljedeća 24 sata, pa je potrebno kupiti određeni gel za porod, nakon čega je H. E. ponudio doktoru novac za gel u iznosu od 100,00 KM, a koji novac je Z. uzeo i stavio u svoj džep, a zatim pitao: „Je li halal?“, da bi potom Z. otišao do pacijentice H. M. te joj je oko 11,00 sati aplicirao tableticu, da bi je potom iza 20:30 sati porodila doktorica B. Š. E., a porodu je prisustvovao i doktor Z. A., na koji način je sebi pribavio imovinsku korist u iznosu primljenog novca od 100,00 KM, a pacijenticu H. M. i njenog supruga H. E. ošteti za navedeni iznos, iako je znao i bio svjestan da se porodi u JU Kantonalna bolnica Zenica ne naplaćuju ni jednoj pacijentici koja je iz Zeničko-dobojskog kantona i da na taj način sebi pribavlja korist i H. M. i H. E. čini štetu, a što je i htio,

čime je počinio produženo krivično djelo „Zloupotreba položaja ili ovlaštenja“ iz člana 383. stav 1. Krivičnog zakona Federacije Bosne i Hercegovine (KZ F BiH) u vezi sa članom 55. KZ F BiH, pa se na osnovu istog člana i propisa, i uz primjenu odredbi člana 49. stav 1. i člana 62. stav 1. i 2. KZ F BiH izriče se:

UVJETNA OSUDA

Utvrdjuje se kazna zatvora u trajanju od 10 (deset) mjeseci, a koja se neće izvršiti ako optuženi A.Z. u roku od 2 (dvije) godine i 6 (šest) mjeseci od dana pravomoćnosti Presude ne učini novo krivično djelo.

U skladu sa članom 114. KZ F BiH optuženom A.Z. u izriče se mjera oduzimanja imovinske koristi stečena izvršenjem krivičnog djela u iznosu od 200,00 (dvije stotine) KM (konvertibilnih maraka) koje je dužan platiti u roku od 15 dana od dana pravomoćnosti Presude u budžet FBiH.

U skladu sa članom 202. stav 1. u vezi člana 199. stav 2. tačka g.) ZKP FBiH optuženi A.Z. se obavezuje da Sudu na ime paušala plati iznos od 150,00 (jedna stotina i pedeset) KM (konvertibilnih maraka) u roku od 15 dana od dana pravomoćnosti Presude.

Obrazloženje

Kantonalno tužilaštvo Zenica je dana 03.09.2025. godine kod ovog Suda podiglo optužnicu, broj: T04 0 KTK 0055124 24 od 03.09.2025. godine, protiv optuženog A.Z., a koja je potvrđena dana 05.09.2025. godine, zbog produženog krivičnog djela Zloupotreba položaja ili ovlaštenja iz člana 383. stav 1. KZ F BiH a u vezi člana 55. KZ F BiH, bliže opisano u dispozitivu Presude.

Optuženi A.Z. , prilikom izjašnjenja o krivnji, na Zapisnik ovog Suda od 02.10.2025. godine, izjasnio se da nije kriv za predmetno krivično djelo, a na glavnom pretresu u cjelosti je priznao izvršenje krivičnog djela koje mu se Optužnicom stavlja na teret, te je izjavio da se kaje i da daje obećanje Sudu da se to više neće ponoviti i da je upoznat sa posljedicama priznanja krivnje.

Tužilac je u dokaznom postupku pročitao i izvršen je uvid u slijedeće dokaze: Zapisnik o saslušanju svjedoka B. M., FUP Sarajevo broj 12/9-291/24 od 22.10.2024. godine; Zapisnik o saslušanju svjedoka B. Š. FUP Sarajevo broj 12/9-1/24 od 28.08.2024. godine; Zapisnik o saslušanju svjedoka H. E., FUP Sarajevo broj 12/9-266/24 od 18.10.2024. godine; Zapisnik o saslušanju svjedoka H. M., FUP Sarajevo broj 12/9-238/24 od 22.07.2024. godine; Zapisnik o saslušanju svjedoka B. Š. E., FUP Sarajevo broj 12/9-138/25 od 31.01.2025. godine; Pravilnik o radu JU Kantonalna bolnica Zenica broj 00-1-02-33-1/21 od 19.01.2021. godine sa Odlukom o izmjenama i dopunama Pravilnika o radu JU Kantonalna bolnica Zenica broj 00-1-02-92/22 od 11.02.2022. godine, Odlukom o izmjenama i dopunama Pravilnika o radu JU Kantonalna bolnica Zenica broj 00-1-02-784/22 od 28.04.2022. godine i Pravilnikom o unutrašnjoj organizaciji i sistematizaciji radnih mjesta Javne ustanove Kantonalna bolnica Zenica od oktobra 2022. godine; Ugovor o radu na neodređeno vrijeme broj 31-30-2055-2/21 od 21.06.2021.

godine;Izvještaj o ostvarenom radu i odsustvovanju radnika sa radnog mjesta za januar 2022. godine,Izvještaj o dežurstvu, pripravnosti, radu u pripravnosti, produženom radu za mjesec januar 2022. godine,Izvještaj o ostvarenom radu i odsustvovanju radnika sa radnog mjesta za avgust 2022. godine,Izvještaj o dežurstvu, pripravnosti, radu u pripravnosti, produženom radu za mjesec avgust 2022. godine, Istorija bolesti JU Kantonalna bolnica Zenica broj 1811 na ime pacijenta B.Š.sa medicinskom dokumentacijom: -Akušerski specijalistički nalaz na prijemu JU Kantonalna bolnica Zenica broj zahtjeva 9809651 od 16.01.2022. godine,Otpusno pismo JU Kantonalna bolnica Zenica, Odjel za trudnice i porodilje, matični broj 173, broj slučaja 12821611 od 18.01.2022. godine;Otpusno pismo JU Kantonalna bolnica Zenica, Odsjek za neonatologiju broj slučaja 12822215 od 18.01.2022. godine;Matični list na ime B.Š.;Terapijski list hirurški na ime B.Š.datum prijema 16.01.2022. godine;Temperaturna lista na ime B.Š.datum prijema 16.01.2022. godine;Unutarnji pregledi na ime B.Š.od 16.01.2022. godine;Sestrinska lista na ime B.Š.od 16.01.2022. godine;Lista opservacije porodilje B. Š., broj protokola 162 od 16.01.2022. godine;ušerski karton, broj kartona 88 od 16.01.2022. godine;CTG nalaz na ime B.Š.od 16.01.2022. godine (09:10 h);CTG nalaz na ime B.Š.od 16.01.2022. godine (19,55 h);Z-dravstvena legitimacija na ime B. Š.;Njega novorođenčeta (sestrinska lista), broj protokola 89 od 16.01.2022. godine sa Listom intervencija;Novorođenče, broj 29 od 16.01.2022. godine;Istorija bolesti JU Kantonalna bolnica Zenica broj 1019 na ime pacijenta H. M. sa medicinskom dokumentacijom: Akušerski specijalistički nalaz na prijemu JU Kantonalna bolnica Zenica broj zahtjeva 10537204 od 05.08.2022. godine,Otpusno pismo JU Kantonalna bolnica Zenica, Prijemna ambulanta -Odjel za trudnice i porode matični broj 2700, broj slučaja 13920384 od 07.08.2022. godine,Otpusno pismo JU Kantonalna bolnica Zenica, Odjel za trudnice i porodilje broj slučaja 13920384 od 07.08.2022. godine,Otpusno pismo JU Kantonalna bolnica Zenica, Odjel za neonatologiju broj slučaja 13924331 od 07.08.2022. godine,Nalaz poroda JU Kantonalna bolnica Zenica broj zahtjeva 10540171 od 05.08.2022. godine,Lista na ime H. M. od 05.08.2022. godine; Temperaturna lista na ime H. M. datum prijema 05.08.2022. godine;Matični list na ime H. M.;Unutarnji pregledi na ime H. M.od 05.08.2025. godine;Lista opservacije porodilje H. M.broj protokola 2252 od 05.08.2022. godine;Nalaz JU Kantonalna bolnica Zenica, Tranfuzijski centar od 05.08.2022. godine;CTG nalaz na ime H. M. od 05.08.2022. godine;Specijalistički nalaz od 05.08.2022. godine;Zdravstvena legitimacija na ime H. M.;Informirani pristanak na predloženu medicinsku mjeru/proceduru potpisan od strane pacijenta H. M.;Njega novorođenčeta (sestrinska lista) od 05.08.2022. godine sa Listom intervencija;Novorođenče, broj 53 od 05.08.2022. godine i Izvod iz kaznene evidencije za A.Z.. Optuženi i Branilac nsu prigovorili sadržaju i zakonitosti dokaza.

Sud je cjeneći izvedene dokaze i priznanje krivnje optuženog A.Z. utvrdio nespornim da je isti počinio radnje na način kako je to bliže opisano u dispozitivu Presude.Priznanje krivnje optuženog A.Z. za predmetno krivično djelo u cjelosti je potkrijepljeno sadržajem navedenih dokaza iz kojih je vidljivo da je počinio radnje i prouzrokovao zakonom zabranjenu posljedicu, bliže opisane u dispozitivu Presude, i da je na taj način ostvario obilježja produženog krivičnog djela Zloupotreba položaja ili ovlaštenja iz člana 383. stav 1. KZ FBiH a u vzi člana 55.KZFBiH.

Dokazi u spisu ukazuju da je kod optuženog A.Z. u kritično vrijeme postojala krivnja za krivično djelo koje mu se Optužbom stavlja na teret. Naime, on jeznao i bio svjestan da čineći radnje, na način kako je to bliže opisano u dispozitivu Presude, postupa protivpravno sa namjerom da sebi pribavi protivpravnu imovinsku korist. Dakle, bio je svjestan svoga djela i htio je njegovo izvršenje te je postupao sa direktnim umišljajem, pa ga je stoga Sud i oglasio krivim.

Iz Izvoda iz kaznene evidencije vidljivo je da je optuženi A.Z. ne osuđivan.

Prilikom odlučivanja o vrsti i visini krivične sankcije Sud je imao u vidu da je za krivično djelo Zloupotreba položaja ili ovlaštenja“ iz člana 383. stav 1. KZ F BiH propisana kazna zatvora od šest mjeseci jedne do pet godina, težinu krivičnog djela, oblik i stepen krivnje optuženog A.Z., s tim da je na strani Optuženog Sud cijenio kao olakšavajuće okolnosti da je priznao izvršenje krivičnog djela, da se kaje, da je dao obećanje da se to više neće ponoviti i da je neosuđivan, da je porodičan i otac troje djece, a na strani Optuženog Sud je cjenio kao otežavajuću okolnost da mu se na teret stavlja produženo krivično djelo. Imajući u vidu navedene okolnosti Sud očekuje da će se sa izrečenom osudom ostvariti opća i individualna svrha izricanja krivičnih sankcija.

Odluka o izrečenj mjeri oduzimanja imovinske koristi stečene izvršenjem krivičnog djela od optuženog A.Z. temelji se na odredbama člana 114.KZFBiH, a nesporno je da se radi o imovinskoj koristi u iznosu od 200,00KM

a istu je Sud izrekao jer oštećeni B. M.H.E. nisu u krivičnom postupku postavili imovinskopravni zahtjev za naknadu štete.

Odluka o troškovima postupka, koji se odnose na paušal u iznosu od 150,00 KM, temelji se na odredbi člana 202. stav 4. u vezi sa članom 199. stav 2. tačka g.) ZKP FBiH, a visinu paušala Sud je odmjerio imajući u vidu složenost i dužinu trajanja postupka, kao i imovinske prilike optuženog A.Z..

Shodno iznešenom valjalo je Sudu odlučiti kao u dispozitivu Presude.

Zapisničar
Drino Melita,s.r.

Sudija
Sabrija Agić,s.r.

PRAVNA POUKA:

Protiv ove Presude može se izjaviti žalba
Kantonalnomo sudu u Zenici u roku od 15 dana
od dana prijema pismenog otpravka Presude.
Stranke i Branilac mogu izjaviti žalbu iz svih zakonskih
razloga, a Oštećeni zbog odluke o troškovima postupka
i odluke o imovinsko pravnom zahtjevu.
Žalba se podnosi putem ovog Suda u tri primjerka.

-ZKP FBiH -Zakon o krivičnom postupku Federacije BiH (Službene novine Federacije BiH, broj 35/ 03, 47/03, 56/03, 74/04, 28/05, 55/06, 53/07, 09/09, 12/10 i 08/13);
-KZ FBiH-Krivični zakon Federacije BiH (Službene novine Federacije BiH, broj 36/03, 37/03, 21/04, 69/04 i 18/05).